

Na osnovu člana 21. Zakona o mikrokreditnim organizacijama ("Službene novine Federacije BiH", broj 59/06), čl. 4., 9. i 25. Zakona o Agenciji za bankarstvo Federacije Bosne i Hercegovine ("Službene novine Federacije BiH", broj 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH, na sjednici održanoj 14. marta 2007. godine, donosi

## **ODLUKU**

### **O NADZORU POSLOVANJA MIKROKREDITNIH ORGANIZACIJA**

#### **Član 1.**

Ovom Odlukom bliže se propisuju osnovne nadležnosti Agencije za bankarstvo Federacije Bosne i Hercegovine (u daljnjem tekstu: FBA), u postupku nadzora poslovanja mikrokreditnih organizacija (u daljnjem tekstu: MKO).

Osnovni cilj ove Odluke je uspostavljanje općih kriterija za provođenje zakonskih nadležnosti FBA u vršenju nadzora, izdavanju naloga, poduzimanju mjera, kao i određivanje rokova za otklanjanje utvrđenih nezakonitosti i nepravilnosti u poslovanju MKO.

#### **Član 2.**

Predmet i sadržaj nadzora kojeg provodi FBA obuhvata nadzor zakonitosti rada, primjenu propisa i održavanje propisanih standarda.

Primjena načela zakonitosti i održavanje propisanih standarda su odgovornost organa upravljanja, nadzora i rukovođenja u MKO i predstavljaju minimalan uvjet za uspješno i stabilno poslovanje MKO.

#### **Član 3.**

FBA nadzire sljedeće aktivnosti i oblasti u poslovanju MKO:

1. osnivanje, promjenu oblika i statusne promjene;
2. iznos i način uplate kapitala u novčanom obliku i uloga u kapital u stvarima i pravima, kao i porijeklo tih sredstava;
3. usaglašenost poslovanja u skladu sa zakonima i drugim propisima;
4. rad organa;
5. kvalitet kreditnog portfelja;
6. poslovanje sa povezanim licima;
7. primjenu Zakona o sprječavanju pranja novca;
8. vezane za sprječavanje finansiranja terorizma;
9. druge specifične oblasti.

#### **Član 4.**

Nadzor iz člana 3. ove Odluke, FBA obavlja na sljedeći način:

1. praćenjem izvještaja, informacija i podataka koje dostavljaju MKO i
2. neposrednim pregledom - kontrolom poslovnih knjiga, knjigovodstvene i druge dokumentacije u sjedištu MKO i njenih organizacionih dijelova iz člana 20. Zakona o mikrokreditnim organizacijama.

FBA je dužna da obezbijedi da se nadzor iz stava 1. ovog člana obavlja u kontinuitetu i u skladu sa usvojenim planom rada.

#### Član 5.

O utvrđenim nalazima nadzora iz člana 3. ove odluke, FBA sastavlja zapisnik sa prijedlogom mjera, koji dostavlja MKO najkasnije u roku od 10 dana od dana okončanja nadzora.

Direktor FBA svojim rješenjem u izuzetnim slučajevima može odrediti i drugi rok za dostavljanje zapisnika sa prijedlogom mjera.

MKO ima pravo prigovora na zapisnik iz stava 1. ovog člana u roku od 5 dana od dana prijema.

Nakon isteka roka za prigovor ili nakon razmatranja prigovora MKO, FBA donosi rješenje o potrebnim aktivnostima MKO za otklanjanje utvrđenih nezakonitosti i nepravilnosti u poslovanju, te određuje rokove za njihovo izvršenje.

Rješenje iz stava 4. ovog člana je konačno.

#### Član 6.

Kada utvrdi nezakonitosti i nepravilnosti u poslovanju MKO, FBA može da:

1. prema MKO i odgovornim licima u MKO primijeni jednu ili više propisanih mjera;
2. postavi određena ograničenja ili zahtjeve i naloži odgovarajuće aktivnosti za usklađivanje poslovanja sa zakonima i drugim propisima;
3. zahtijeva dostavljanje posebnih izvještaja u odgovara-jućim rokovima;
4. izda prekršajni nalog.

#### Član 7.

Akti FBA iz ove Odluke predstavljaju službenu tajnu.

#### Član 8.

Odredbe ove Odluke odnose se na MKO i organizacione dijelove MKO u smislu člana 20. Zakona o mikrokreditnim organizacijama.

#### Član 9.

Ova Odluka stupa na snagu osmog dana nakon objavljivanja u "Službenim novinama Federacije BiH".

Broj 01-1-393-8/07  
14. marta 2007. godine  
Sarajevo

Predsjednik Upravnog odbora  
mr. **Eldar Arnautović**, s. r.